



Verschnuuffer

Création V

«Vereinigung zur Förderung der individuellen und nachhaltigen Kreativität bei den Verschnuuffern»

S kunnt us der Büggse, was me bruucht.
Yo sälbermache, waisch das schluucht!
Tue drum nid grooss Dy Hirni blooge,
Falls aifach no-n-em Pryys kasch frooge.

Und denn isch au der Kund no Keenig,
Fir die mit Gäld, zellt Aaschtand wenig.
Frisch saisch am Beschte grad, was Sach isch
Zem Bischbyl, dass der Output schwach isch.

Im gweente 9 bis 5i Job
Goot s Dir au physisch nimm ganz top.
Jä, was am maischte hasse duesch?
Ou – wenn De sälber dängge muesch!

Hesch gar kai Grund Dy Gsääss z beweeye,
Rächt zaalt, duet me Dir s aaneleeege!
Gärn sälber schaffe? – Wärsch e Gloon!
In däm Sinn: „Proscht“, mit Côte-du-Rhône.

Tief gaischtig drääg und unbeweeeglig,
S isch kreativ syy so nid meeglig.
De bisch sogar zem Schnuufe z fuul –
Verlääge stopfsch gschwind Chips ins Muul.

Es lauft der Wirtschaft zer Zyt rund.
Rund wirtsch au Du - nuur isch s nid gsund.
S wird jeedes Glüschkli gschäftlig gnutzt,
Cash git s per PIN – scho isch s verputzt.

Hesch gar kai Chance bi däm Triibe,
No schwarzi Kontozaale z schryybe!
Und drum verdiensch als glaine Troscht:
Un po' Prosecco, Lachs und Toscht!

Fändsch sogar d Fasnacht no ganz glatt
Falls ooni Uffwand die fänd statt.
E ganzes Joor muesch sälber yiebe:
Rund drumme, glatt syy und e Liebel!

Und schliesslig laade d'Sujetfritze,
zem kreative Zämmesitze
bi Minschterkääs und Edelzwicker.
Doch wirtsch nid kreativ, nur digger.

Wo isch Dy inner Fyyr au aane?
Und wo Dy Esprit, nundefaane?
Uf aimool isch Dir nimme wool,
und sofort hilft: E Zwaier Dôle.

Fir was bisch in die Clique ko?
Wieso wottsch mit ys aanestoo?
De waisch, wieso d Verschnuuffer bisch:
Well s aifach ébbis Bsunders isch!

Mir sinn no kreativ und glatt
und bringe Frischi in die Stadt!
Sottsch s kreativ syy fokussiere:
Bim Drumme sott s Dir nid passiere.

Mir sinn no richtig glatti Keibe
ein jeder Siech und jedes Weibe!
Mir mien au nid go revoluzze
zem d Fasnacht luschtig kenne nutze!

Nuur laider git s z vyl Reglemänt,
und s hänn die glatte Elemänt
wie: Sponti naime ain go nä,
im Routeplan der Gaischt uffgä!

Dy Gosdym muess e Bijou syy
sunscht wirtsch s am Beschte grad in Rhy!
Doch isch das laider schwär verbotte
well mir jo d Umwält schitze sotte.

Was s Joor duur konsumiersch isch krass!
Und aigetlig wartsch numme, dass
Dy Zwangsgosdym vom Liib kasch rysse!
Nuur so verdiensch e Halbe Wysse!

Drum: Syg spontan – s isch zwar nid logisch –
well so verglemmt syy doch e Bloog isch,
und gib Dym Schweinehund e Tritt.
Denn macht au d Psyche wider mit!

Kunnsch an der Fasnacht grad ins Schwärme
und gniessisch au dä heerlig Lärme,
wo unsri Stadt reanimiert,
bevoor sy völlig s Gsicht verliert.

Mir hänn der Plausch und sinn der Hammer,
nid nuur drey Dääg – s wär jo e Jammer!
Syt fuffzig Joor sinn mir der Hit:
Uf unser Wool – scheen, dass s ys git!

www.verschnuuffer.ch